

Statuts

Egualitad da schlattagna

Las denominaziuns da persungas valan per tottas dus schlattagnas.

I. Fegnameira e domicil

- Art. 01 L'«Uniun Rumantscha Rezia Bassa» ò la fegnameira da mantigneir e cultivar igl lungatg e la cultura rumantscha, spezialmaintg igl cant rumantsch tradiziunal.
El reunescha igls Rumantschs dalla Svizra Orientala e promova tot chegl tgi serva allas tendenzas ainten la Rumantscheia e giu la Bassa, an amprema lengia dantant aint igl intschess dalla Svizra Orientala.
An spezial vot el approfondar la cunaschientscha digl lungatg e dalla cultura rumantscha digls sies commembers, sustigneir las lavours dalla Leia Rumantscha e dad otras uniuns cun la madema fegnameira scu er luvrar an favour digl rumantsch ainten en ambiaint tudestg.
- Art. 02 Aint l'Uniun Rumantscha Rezia Bassa gioldan tot igls idioms rumantschs igls madems dretgs e consideraziun eguala.
- Art. 03 An dumondas politicas e confessiunalas è l'Uniun Rumantscha Rezia Bassa absolutamaintg neutrala.
- Art. 04 Igl sies li da domicil è Sargans, igl sies intschess la Svizra orientala.

II. Commembers e lour responsabladad finanziaria

- Art. 05 Mintga Rumantsch ed amei digl rumantsch pò daventar commember. Igls commembers stattan an nign gro garants cun lour facultad privata l'Uniun Rumantscha Rezia Bassa stat sulettamaintg garant cun la sia facultad da fatschenta.
- Art. 06 Arisguard antradas ed extradas, recepciun ed exclusiun da commembers valan igls artetgels respectivs digl Codesch civil svizzer.

III. Organs

- Art. 07 Igls organs dall'Uniun Rumantscha Rezia Bassa èn:
- la radunanza digls commembers (radunanza generala)
- la suprastanza
- igls revisours da chint

A La radunanza generala

- Art. 08 La radunanza generala ordinaria vign convocada dalla suprastanza igl ampren quartal digl onn. La suprastanza u en tschintgavel digls commembers pò proponer ena radunanza extraordinaria. La radunanza generala vign convocada antras en'invitaziun persunala agls commembers.
- Art. 09 La radunanza generala eligia igl parsoura, quatter oters commembers da suprastanza e dus revisours da chint e deliberescha las tractandas preschentadas ad ella dalla suprastanza. Tractandas d'impurtanza secundara pon neir deliberadas sainza neir visadas ordavant. Davart dalla deliberaziun definitiva d'ena tractanda betg preveida decida la radunanza generala.
- Art. 10 Ene ad onn organisescha l'Uniun Rumantscha Rezia Bassa ena seira rumantscha. La suprastanza ed eventualmaintg subcumischungs fon las preparativas necessarias.

B La suprastanza

- Art. 11 La suprastanza sa cumpona da tschintg commembers (president, actuar, cassier e dus consuprastants) e sa constituescha sasezza. Schi pussebel, duessan las persungas eligeidas derivar or digl intschess da differents idioms. Ena perioda d'uffezi cozza treis onns e finescha definitivamaintg siva da quatter elecziuns.
- Art. 12 La suprastanza represchainta l'Uniun Rumantscha Rezia Bassa, magna las sias fatschentas, prepara las tractandas per la radunanza generala e proveda tot chegl tgi serva agl sies scopo.

Ella è cumpetenta d'adossar incumbensas spezialas a singuls commembers ed a cumischungs eligeidas dad ella.

C Igls revisours da chint

Art. 13 Igls revisours da chint examineschan igl chint annual scu er l'administraziun dallas finanzas e rapportan surlonder a caschung dalla radunanza generala.

D Cumischungs spezialas

Art. 14 Las subcumischungs spezialas exequeschan las incumbensas surdadas ad ellas dalla suprastanza:

- dirigent digl Chor mixt rumantsch
- pagina d'internet
- preparaziuns per festas
- relaziuns cun las medias
- e.u.a.

IV. Finanzas

Art. 15 Igls meds finansials dereivan:

- dallas contribuziuns annualas digls commembers
- da legats e contribuziuns voluntarias
- d'antradas d'arranschamaints spezial (Chor mixt rumantsch)
- La contribuziun annuala digls commembers vign fixada mintg'onni dalla radunanza generala. Giuvenils d'anfignen 20 onns paian nigra contribuziun, igls ulteriours commembers paian sainza excepziun l'antiera contribuziun annuala.

Art. 16 L'onni da gestiun cozza mintgamai anfignen igls 31 da december.

Art. 17 La suprastanza è cumpetenta da decretar expensas d'anfignen 3'000 fr. ad onni.

V. Commembers d'onour

Art. 18 Commembers tgi on presto fitg buna lavour per l'Uniun Rumantscha Rezia Bassa durant 20 onns, pò la radunanza generala eliger scu commembers d'onour.

VI. Revisiun digls statuts

Art. 19 Dus terzas digls commembers preschaints pon decider davart ena revisiun digls statuts.

VII. Dissoluziun dall'Uniun Rumantscha Rezia Bassa

Art. 20 Per dissolver l'Uniun Rumantscha Rezia Bassa, dovrigl igl consentiment da dus terzas da tot igls commembers.

Art. 21 Ena facultad eventuala vign surdada alla Leia Rumantscha a Coira cun la cundiziun da surlascher chella ad en'eventuala nova instituziun rumantscha ainten la Svizra Orientala cun fegnameiras sumigliaintas. Schi ena tala na vign betg fundada ainfer 5 onns, davainta la facultad proprietad dalla Leia Rumantscha.

VIII. Disposiziun finala

Art. 22 Igls statuts dall'Uniun Rumantscha District Sargans e conturn digls 30 d'avregl 1966 èn nias revedias risguardond l'extensiun digl intschess e la midada digl nom an «Uniun Rumantscha Rezia Bassa» ed approvos a caschung dalla radunanza generala digls 18 da mars 2018. Els von an vigour cun la radunanza generala digl 2018. Revisiun digl artetgel 16 a caschung dalla radunanza generala digls 15-08-20. Revisiun digls artetgels 09 ed 11 a caschung dalla radunanza generala digls 28-08-2021.

Jenins, igls 28-08-2021

Per la suprastanza dall'Uniun Rumantscha Rezia Bassa:

igl parsoura: Rinaldo Caduff

I actuara: Lea Killias